




官

五經

書下

2084
2 止



2084
2

御拂示書經

周書

泰誓上

惟十有三年春大會于孟津節王曰嗟我友邦
冢君越我御事庶士明聽誓節惟天地萬物父
母惟人萬物之靈亶聰明作元后元后作民父
母節今商王受弗敬上天降災下民節沈湎冒
色敢行暴虐罪人以族官人以世惟宮室臺榭

五經

書下

日本

五經
書下
一
陂池侈服以殘害于爾萬姓焚炙忠良剝剔孕婦
皇天震怒命我文考肅將天威大勳未集節
肆予小子發以爾友邦冢君觀政于商惟受罔
有悛心乃夷居弗事上帝神祇遺厥先宗廟弗
祀犧牲柔盛既于凶盜乃曰吾有民有命罔懲
其侮節天佑下民作之君作之師惟其克相上
帝寵綏四方有罪無罪予曷敢有越厥志節同
力度德同德度義受有臣億萬惟億萬心予有

臣三千惟一心節商罪貫盈天命誅之予弗順
天厥罪惟鈞節予小子夙夜祇懼受命文考類
于上帝宜于冢土以爾有衆底天之罰節天矜
于民民之所欲天必從之爾尚弼予一人永清
四海時哉弗可失

泰誓中

惟戊午王次于河朔羣后以師畢會王乃徇師
而誓節曰嗚呼西土有衆咸聽朕言節我聞吉

人為善惟日不足凶人為不善亦惟日不足今
 商王受力行無度播棄黎老昵比罪人淫酗肆
 虐臣下化之朋家作仇脅權相滅無辜顛天穢
 德彰聞節惟天惠民惟辟奉天有夏桀弗克若
 天流毒下國天乃佑命成湯降黜夏命節惟受
 罪浮于桀剝喪元良賊虐諫輔謂已有天命謂
 敬不足行謂祭無益謂暴無傷厥鑒惟不遠在
 彼夏王天其以予乂民朕夢協朕卜襲于休祥

戎商必克節受有億兆夷人離心離德予有亂
 臣十人同心同德雖有周親不如仁人節天視
 自我民視天聽自我民聽百姓有過在予一人
 今朕必往節我武惟揚侵于之彊取彼凶殘我
 伐用張于湯有光節勗哉夫子罔或無畏寧執
 非敵百姓懍懍若崩厥角嗚呼乃一德一心立
 定厥功惟克永世

泰誓下

五經 書下 三
時厥明王乃大巡六師明誓衆士節王曰嗚呼我西土君子天有顯道厥類惟彰今商王受狎侮五常荒怠弗敬自絕于天結怨于民節斲朝涉之脛剖賢人之心作威殺戮毒痛四海崇信姦回放黜師保屏棄典刑囚奴正士郊社不修宗廟不享作奇技淫巧以悅婦人上帝弗順祝降時喪爾其孜孜奉予一人恭行天罰節古人有言曰撫我則后虐我則讐獨夫受洪惟作威

乃汝世讐樹德務滋除惡務本肆予小子誕以爾衆士殄殲乃讐爾衆士其尚迪果殺以登乃辟功多有厚賞不迪有顯戮節嗚呼惟我文考若日月之照臨光于四方顯于西土惟我有周誕受多方節予克受非予武惟朕文考無罪受克予非朕文考有罪惟予小子無良

牧誓

時甲子昧爽王朝至于商郊牧野乃誓王左杖

黃鉞右秉白旄以麾曰逃矣西土之人節王曰
 嗟我友邦冢君御事司徒司馬司空亞旅師氏
 千夫長百夫長節及庸蜀羌髳微盧彭濮人節
 稱爾戈比爾干立爾矛予其誓節王曰古人有
 言曰牝雞無晨牝雞之晨惟家之索節今商王
 受惟婦言是用昏棄厥肆祀弗答昏棄厥遺王
 父母弟不迪乃惟四方之多罪逋逃是崇是長
 是信是使是以爲大夫卿士俾暴虐于百姓以

茲宄于商邑節今予發惟恭行天之罰今日之
 事不愆于六步七步乃止齊焉夫子勗哉節不
 愆于四伐五伐六伐七伐乃止齊焉勗哉夫子
 節尚桓桓如虎如貔如熊如羆于商郊弗迓克
 奔以役西土勗哉夫子節爾所弗勗其于爾躬
 有戮

武成

惟一月壬辰旁死魄越翼日癸巳王朝步自周

于征伐商節厥四月哉生明王來自商至于豐
乃偃武修文歸馬于華山之陽放牛于桃林之
野示天下弗服節丁未祀于周廟邦甸侯衛駿
奔走執豆蓬越三日庚戌柴望大告武成節既
生魄庶邦冢君暨百工受命于周節王若曰嗚
呼羣后惟先王建邦啓土公劉克篤前烈至于
太王肇基王迹王季其勤王家我文考文王克
成厥勳誕膺天命以撫方夏大邦畏其力小邦

懷其德惟九年大統未集予小子其承厥志節
底商之罪告于皇天后土所過名山大川曰惟
有道曾孫周王發將有大正于商今商王受無
道暴殄天物害虐丞民爲天下逋逃主萃淵藪
予小子既獲仁人敢祗承上帝以遏亂畧莘夏
蠻貊罔不率俾節恭天成命肆予東征綏厥士
女惟其士女篚厥玄黃昭我周王天休震動用
附我大邑周節惟爾有神尚克相予以濟兆民

五經 書 卷六
無作神羞。既戊午，師渡孟津。癸亥，陳于商郊。俟天休命。甲子昧爽，受率其旅。若林，會于牧野。罔有敵于我師，前徒倒戈，攻于後，以北。血流漂杵。一戎衣，天下大定。乃反商政，政由舊。釋箕子囚，封比干墓，式商容閭，散鹿臺之財，發鉅橋之粟，大賚于四海，而萬姓悅服。節列爵，惟五分土，惟三建官，惟賢位，事惟能，重民五教，惟食喪祭，惇信明義，崇德報功，垂拱而天下治。

洪範

惟十有三祀，王訪于箕子。節王乃言曰：嗚呼！箕子，惟天陰隲下民，相協厥居，我不知其彝倫攸叙。節箕子乃言曰：我聞在昔，鯀陞洪水，汨陳其五行。帝乃震怒，不畀洪範九疇。彝倫攸斁，鯀則殛死。禹乃嗣興，天乃錫禹洪範九疇。彝倫攸叙。節初一日：五行。次二日：敬用五事。次三日：農用八政。次四日：協用五紀。次五日：建用皇極。次六

曰又用三德次七曰明用稽疑次八曰念用庶
 徵次九曰嚮用五福威用六極節一五行一曰
 水二曰火三曰木四曰金五曰土水曰潤下火
 曰炎上木曰曲直金曰從革土爰稼穡潤下作
 鹹炎上作苦曲直作酸從革作辛稼穡作甘節
 二五事一曰貌二曰言三曰視四曰聽五曰思
 貌曰恭言曰從視曰明聽曰聰思曰睿恭作肅
 從作乂明作哲聰作謀睿作聖節三八政一曰

食二曰貨三曰祀四曰司空五曰司徒六曰司
 寇七曰賓八曰師節四五紀一曰歲二曰月三
 曰日四曰星辰五曰曆數節五皇極皇建其有
 極斂時五福用敷錫厥庶民惟時厥庶民于汝
 極錫汝保極節凡厥庶民無有淫朋人無有比
 德惟皇作極節凡厥庶民有猷有爲有守汝則
 念之不協于極不罹于咎皇則受之而康而色
 曰予攸好德汝則錫之福時人斯其惟皇之極

節無虐筮獨而畏高明節人之有能有為使羞
其行而邦其昌凡厥正人既富方穀汝弗能使
有好于而家時人斯其辜于其無好德汝雖錫
之福其作汝用咎節無偏無陂遵王之義無有
作好遵王之道無有作惡遵王之路無偏無黨
王道蕩蕩無黨無偏王道平平無反無側王道
正直會其有極歸其有極節曰皇極之敷言是
彝是訓于帝其訓節凡厥庶民極之敷言是訓

是行以近天子之光曰天子作民父母以為天
下王節六三德一曰正直二曰剛克三曰柔克
平康正直彊弗友剛克爨友柔克沉潛剛克高
明柔克節惟辟作福惟辟作威惟辟玉食臣無
有作福作威玉食節臣之有作福作威玉食其
害于而家凶于而國人用側頗僻民用僭忒節
七稽疑擇建立卜筮人乃命卜筮節曰雨曰霽
曰蒙曰驛曰克節曰貞曰悔節凡七卜五占用

二衍忒節立時人作卜筮三人占則從二人之言節汝則有大疑謀及乃心謀及卿士謀及庶人謀及卜筮汝則從龜從筮從卿士從庶民從是之謂大同身其康彊子孫其逢吉汝則從龜從筮從卿士逆庶民逆吉卿士從龜從筮從汝則逆庶民逆吉庶民從龜從筮從汝則逆卿士逆吉汝則從龜從筮逆卿士逆庶民逆作內吉作外凶龜筮共違于人用靜吉用作凶節八庶

徵曰雨曰暘曰燠曰寒曰風曰時五者來備各以其叙庶草蕃廡節一極備凶一極無凶節曰休徵曰肅時雨若曰乂時暘若曰哲時燠若曰謀時寒若曰聖時風若曰咎徵曰狂恒雨若曰僭恒暘若曰豫恒燠若曰急恒寒若曰蒙恒風若節曰王省惟歲卿士惟月師尹惟日節歲月日時無易百穀用成乂用明俊民用章家用平康節日月歲時既易百穀用不成乂用昏不明

五經
書
七
俊民用微家用不寧節庶民惟星星有好風星
有好雨日月之行則有冬有夏月之從星則以
風雨節九五福一曰壽二曰富三曰康寧四曰
攸好德五曰考終命節六極一曰凶短折二曰
疾三曰憂四曰貧五曰惡六曰弱

旅獒

惟克商遂通道于九夷八蠻西旅底貢厥獒太
保乃作旅獒用訓于王節曰嗚呼明王慎德四

夷咸賓無有遠邇畢獻方物惟服食器用節王
乃昭德之致于異姓之邦無替厥服分寶玉于
伯叔之國時庸展親人不易物惟德其物節德
盛不狎侮狎侮君子罔以盡人心狎侮小人罔
以盡其力節不役耳目百度惟貞節玩人喪德
玩物喪志節志以道寧言以道接節不作無益
害有益功乃成不貴異物賤用物民乃足犬馬
非其土性不畜珍禽奇獸不育于國不寶遠物

則遠人格所寶惟賢則邇人安節嗚呼夙夜罔或不勤不矜細行終累大德爲山九仞功虧一簣節允迪茲生民保厥居惟乃世王

金縢

既克商二年王有疾弗豫節一公曰我其爲王穆卜節周公曰未可以戚我先王節公乃自以爲功爲三壇同墀爲壇於南方北面周公立焉植璧秉珪乃告太王王季文王節史乃册祝曰

惟爾元孫某邁厲虐疾若爾三王是有丕子之責于天以旦代某之身節予仁若考能多材多藝能事鬼神乃元孫不若且多材多藝不能事鬼神節乃命于帝庭敷佑四方用能定爾子孫于下地四方之民罔不祇畏嗚呼無墜天之降寶命我先王亦永有依歸節今我卽命于元龜爾之許我我其以璧與珪歸俟爾命爾不許我我乃屏璧與珪節乃卜三龜一習吉啓籥見書

乃并是吉。節公曰：體王其罔害予小子，新命于三王，惟永終是圖。茲攸俟，能念予一人。節公歸，乃納册于金縢之匱中。王翼日乃瘳。節武王既喪管叔及其羣弟，乃流言於國曰：公將不利於孺子。節周公乃告二公曰：我之弗辟，我無以告我先王。節周公居東二年，則罪人斯得。節于後公乃為詩以貽王，名之曰《鷓鴣》。王亦未敢誚公。節秋大熟，未獲。天大雷電，以風禾，盡偃。大木斯

新當
作親

拔邦人大恐。王與大夫盡弁，以啓金縢之書，乃得周公所自以為功，代武王之說。節二公及王乃問諸史與百執事，對曰：信噫，公命我勿敢言。節王執書以泣曰：其勿穆卜。昔公勤勞王家，惟予沖人弗及知。今天動威，以彰周公之德，惟朕小子其新逆，我國家禮亦宜之。節王出郊，天乃雨，反風，禾則盡起。二公命邦人凡大木所偃，盡起而築之。歲則大熟。

大誥

王若曰。猷。大誥爾多邦。越爾御事。弗弔。天降割于我家。不少延。洪惟我幼冲人。嗣無疆大歷服。弗造哲迪。民康矧曰。其有能格。知天命。節。已。予惟小子。若涉淵水。予惟往求朕攸濟。敷賁敷前人受命。茲不忘大功。予不敢閉于天降威用。節。寧王遺我大寶龜。紹天明。卽命曰。有大艱于西土。西土人亦不靜。越茲蠢。節。殷小腆。誕敢紀其

叙。天降威。知我國有疵。民不康。曰。予復反鄙我周邦。節。今蠢。今翼日。民獻有十夫。予翼以于救寧武圖功。我有大事休。朕卜并吉。節。肆。予告我友邦君。越尹氏庶士御事。曰。予得吉卜。予惟以爾庶邦。于伐殷逋播臣。節。爾庶邦君。越庶士御事。罔不反曰。艱大。民不靜。亦惟在王宮邦君室。越予小子考翼不可征。王害不違卜。節。肆。予冲人永思艱。曰。嗚呼。允蠢。鰥寡哀哉。予造天役。遺

大投艱于朕身。越予冲人，不卬自恤。義爾邦君，越爾多士。尹氏御事，綏予曰：無愆于恤，不可不成。乃寧考圖功。節已予惟小子，不敢替上帝命。天休于寧王，興我小邦。周寧王惟卜用，克綏受茲命。今天其相民，矧亦惟卜用。嗚呼！天明畏，弼我不丕基。節王曰：爾惟舊人，爾不克遠省，爾知寧王若勤哉！天闕愆我成功，所予不敢不極。卒寧王圖事，肆予大化，誘我友邦君。天棗忱辭，其

考我民，予曷其不于前寧人圖功攸終。天亦惟用勤愆我民，若有疾，予曷敢不于前寧人攸受休畢。節王曰：若昔朕其逝，朕言艱日思，若考作室，旣底法。厥子乃弗肯堂，矧肯構。厥父菑，厥子乃弗肯播，矧肯穫。厥考翼其肯曰：予有後弗棄基。肆予曷敢不越卬。救寧王太命。節若兄考，乃有友伐厥子，民養其勸弗救。節王曰：嗚呼！肆哉！爾庶邦君，越爾御事，爽邦由哲，亦惟十人，迪知

五經
上帝命越天棐忱爾時罔敢易法矧今天降戾
于周邦惟大艱人誕鄰胥伐于厥室爾亦不知
天命不易節予永念曰天惟喪殷若稽夫予曷
敢不終朕畝天亦惟休于前寧人節予曷其極
卜敢弗于從率寧人有指疆土矧今卜并吉肆
朕誕以爾東征天命不僭卜陳惟若茲

微子之命

王若曰猷殷王元子惟稽古崇德象賢統承先

王修其禮物作賓于王家與國咸休永世無窮
節嗚呼乃祖成湯克齊聖廣淵皇天眷佑誕受
厥命撫民以寬除其邪虐功加于時德垂後裔
節爾惟踐修厥猷舊有令聞恪慎克孝肅恭神
人予嘉乃德曰篤不忘上帝時歆下民祗協庸
建爾于上公尹茲東夏節欽哉往敷乃訓慎乃
服命率由典常以蕃王室弘乃烈祖律乃有民
永綏厥位毗予一人世世享德萬邦作式俾我

有周無斁。節鳴呼往哉。惟休無替朕命。

康誥

惟三月哉生魄。周公初基。作新大邑于東國洛。四方民大和會。侯甸男邦采衛。百工播民和。見士于周。周公咸勤。乃洪大誥治。節王若曰。孟侯。朕其弟。小子封。節惟乃丕顯考文王。克明德慎罰。節不敢侮鰥寡。庸庸。祗祗。威威。顯民。用肇造我區夏。越我一二邦。以修我西土。惟時怙冒。聞

于上帝。帝休。天乃大命文王。殪戎殷。誕受厥命。越厥邦厥民。惟時叙。乃寡兄勗。肆汝小子封。在茲東土。節王曰。嗚呼。封。汝念哉。今民將在祗。通乃文考。紹聞衣德言。往敷求于殷先哲王。用保乂民。汝不遠。惟商耆成人。宅心知訓。別求聞由古先哲王。用康保民。弘于天。若德裕乃身。不廢在王命。節王曰。嗚呼。小子封。惇。瘝乃身。敬哉。天畏棗忱。民情大可見。小人難保。往盡乃心。無康

好逸豫乃其又民我聞曰怨不在大亦不在小
 惠不惠懋不懋節已汝惟小子乃服惟弘王應
 保殷民亦惟助王宅天命作新民節王曰嗚呼
 封敬明乃罰人有小罪非責乃惟終自作不典
 式爾有厥罪小乃不可不殺乃有大罪非終乃
 惟責災適爾既道極厥辜時乃不可殺節王曰
 嗚呼封有叙時乃大明服惟民其勅懋和若有
 疾惟民其畢棄咎若保赤子惟民其康乂節非

汝封刑人殺人無或刑人殺人非汝封又曰劓
 刑人無或劓刑人節王曰外事汝陳時臬司師
 茲殷罰有倫節又曰要囚服念五六日至于旬
 時不蔽要囚節王曰汝陳時臬事罰蔽殷彝用
 其義刑義殺勿庸以次汝封乃汝盡遜曰時叙
 惟曰未有遜事節已汝惟小子未其有若汝封
 之心朕心朕德惟乃知節凡民自得罪寇攘姦
 宄殺越人于貨啓不畏死罔弗憝節王曰封元

五經 書 卷下
惡大慙。矧惟不孝不友。子弗祗服厥父事。大傷厥考心。于父不能字厥子。乃疾厥子。于弟弗念天顯。乃弗克恭厥兄。兄亦不念鞠子哀。大不友于弟。惟弔茲不于我政。人得罪。天惟與我民彝。大泯亂。曰。乃其速由文王作罰。刑茲無赦。節不率大戛。矧惟外庶子訓人。惟厥正人。越小臣諸節。乃別播敷。造民大譽。弗念弗庸。瘝厥君。時乃引惡。惟朕慙已。汝乃其速由茲義。率殺。節亦惟

君惟長。不能厥家人。越厥小臣。外正惟威。惟虐大放。王命。乃非德用乂。節汝亦罔不克敬典。乃由裕民。惟文王之敬忌。乃裕民曰。我惟有及。則予一人以懌。節王曰。封。爽惟民迪吉康。我時其惟殷先哲王德。用康乂民。作求。矧今民罔迪。不適。不迪。則罔政在厥邦。節王曰。封。予惟不可不監。告汝德之說。于罰之行。今惟民不靜。未戾厥心。迪屢未同。爽惟天其罰殛我。我其不怨。惟厥

罪無在大亦無在多矧曰其尚顯聞于天節王
曰嗚呼封敬哉無作怨勿用非謀非彛蔽時忱
丕則敏德用康乃心顧乃德遠乃猷裕乃以民
寧不汝瑕殄節王曰嗚呼肆汝小子封惟命不
于常汝念哉無我殄享明乃服命高乃聽用康
乂民節王若曰往哉封勿替敬典聽朕告汝乃
以殷民世享

酒誥

王若曰明大命于妹邦節乃穆考文王肇國在
西土厥誥毖庶邦庶士越少正御事朝夕曰祀
茲酒惟天降命肇我民惟元祀節天降威我民
用大亂喪德亦罔非酒惟行越小大邦用喪亦
罔非酒惟辜節文王誥教小子有正有事無彛
酒越庶國飲惟祀德將無醉節惟曰我民迪小
子惟土物愛厥心臧聰聽祖考之彛訓越小大
德小子惟一節妹土嗣爾股肱純其藝黍稷奔

走事厥考厥長肇牽車牛遠服賈用孝養厥父
母厥父母慶自洗腆致用酒節庶士有正越庶
伯君子其爾典聽朕教爾大克羞者惟君爾乃
飲食醉飽不惟曰爾克永觀省作稽中德爾尚
克羞饋祀爾乃自介用逸茲乃允惟王正事之
臣茲亦惟天若元德永不忘在王家節王曰封
我西土裴徂邦君御事小子尚克用文王教不
腆于酒故我至于今克受殷之命節王曰封我

聞惟曰在昔殷先哲王迪畏天顯小民經德秉
哲自成湯咸至于帝乙成王畏相惟御事厥裴
有恭不敢自暇自逸矧曰其敢崇飲節越在外
服侯甸男衛邦伯越在內服百僚庶尹惟亞惟
服宗工越百姓里居罔敢湏于酒不惟不敢亦
不暇惟助成王德顯越尹人祗辟節我聞亦惟
曰在今後嗣王酣身厥命罔顯于民祗保越怨
不易誕惟厥縱淫泆于非彝用燕喪威儀民罔

不盡傷心。惟荒腆于酒。不惟自息。乃逸厥心。疾
狠不克。畏死。辜在商邑。越殷國滅。無罹。弗惟德
馨。香祀登聞于天。誕惟民怨。庶羣自酒。腥聞在
上。故天降喪于殷。罔愛于殷。惟逸。天非虐。惟民
自速辜。節王曰。封。予不惟若茲多誥。古人有言
曰。人無於水監。當於民監。今惟殷墜厥命。我其
可不。大監撫于時。節予惟曰。汝劼愆。殷獻臣侯
甸。男衛。矧太史友。內史友。越獻臣百宗。工矧惟

爾事。服休服采。矧惟若疇。圻父薄違。農父若保
宏父定辟。矧汝剛制于酒。節厥或誥曰。羣飲。汝
勿佚。盡執拘以歸于周。予其殺。節又惟殷之迪
諸臣。惟工。乃酒于酒。勿庸殺之。姑惟教之。節有
斯明享。乃不用我教辭。惟我一人弗恤。弗蠲乃
事。時同于殺。節王曰。封。汝典聽朕愆。勿辯。乃司
民。酒于酒。

梓材

王曰封以厥庶民暨厥臣達大家以厥臣達王
惟邦君節汝若恒越曰我有師師司徒司馬司
空尹旅曰予罔厲殺人亦厥君先敬勞肆徂厥
敬勞肆往姦宄殺人歷人宥肆亦見厥君事戕
敗人宥節王啓監厥亂爲民曰無胥戕無胥虐
至于敬寡至于屬婦合由以容王其效邦君越
御事厥命曷以引養引恬自古王若茲監罔攸
辟節惟曰若稽田節既勤敷蓄惟其陳修爲厥疆

畎若作室家節既勤垣墉惟其塗墍茨若作梓材
既勤樸斲惟其塗丹雘節今王惟曰先王既勤
用明德懷爲夾庶邦享作兄弟方來亦既用明
德后式典集庶邦丕享節皇天既付中國民越
厥疆土于先王節肆王惟德用和懌先後迷民
用懌先王受命節已若茲監惟曰欲至于萬年
惟王子子孫孫永保民

召誥

惟二月既望越六日乙未王朝步自周則至于
豐節惟太保先周公相宅越若來三月惟丙午
朏越三日戊申太保朝至于洛卜宅厥既得卜
則經營節越三日庚戌太保乃以庶殷攻位于
洛汭越五日甲寅位成節若翼日乙卯周公朝
至于洛則達觀于新邑營節越三日丁巳用牲
于郊牛二越翼日戊午乃社于新邑牛一羊一
豕一節越七日甲子周公乃朝用書命庶殷侯

甸男邦伯節厥既命殷庶庶殷丕作節太保乃
以庶邦冢君出取幣乃復入錫周公曰拜手稽
首旅王若公誥告庶殷越自乃御事節嗚呼皇
天上帝改厥元子茲大國殷之命惟王受命無
疆惟休亦無疆惟恤嗚呼曷其奈何弗敬節天
既遐終大邦殷之命茲殷多先哲王在天越厥
後王後民茲服厥命厥終智藏瘝在夫知保抱
攜持厥婦子以哀籲天徂厥亡出執嗚呼天亦

哀于四方民其眷命用懋王其疾敬德節相古
先民有夏天迪從子保面稽天若今時既墜厥
命今相有殷天迪格保面稽天若今時既墜厥
命節今冲子嗣則無遺壽考曰其稽我古人之
德矧曰其有能稽謀自天節嗚呼有王雖小元
子哉其不能誠于小民今休王不敢後用顧畏
于民節王來紹上帝自服于土中且曰其作
大邑其自時配皇天祀于上下其自時中又

王厥有成命治民今休節王先服殷御事比介
于我有周御事節性惟日其邁節王敬作所不
可不敬德節我不可不監于有夏亦不可不監
于有殷我不敢知曰有夏服天命惟有歷年我
不敢知曰不其延惟不敬厥德乃早墜厥命我
不敢知曰有殷受天命惟有歷年我不敢知曰
不其延惟不敬厥德乃早墜厥命節今王嗣受
厥命我亦惟茲二國命嗣若功王乃初服節嗚

呼若生子罔不在厥初生自貽哲命今天其命
哲命吉凶命歷年知今我初服節宅新邑肆惟
王其疾敬德王其德之用祈天永命節其惟王
勿以小民淫用非彝亦敢殄戮用乂民若有功
節其惟王位在德元小民乃惟刑用于天下越
王顯節上下勤恤其曰我受天命丕若有夏歷
年式勿替有殷歷年欲王以小民受天永命節
拜手稽首曰予小臣敢以王之讐言民百君子越

友民保受王威命明德王末有成命王亦顯我
非敢勤惟恭奉幣用供王能祈天永命

洛誥

周公拜手稽首曰朕復子明辟節王如弗敢及
天基命定命予乃胤保大相東土其基作民明
辟節予惟乙卯朝至于洛師我卜河朔黎水我
乃卜澗水東灑水西惟洛食我又卜灑水東亦
惟洛食俘來以圖及獻卜節王拜手稽首曰公

不敢不敬天之休來相宅其作周匹休公既定
宅侂來來視予卜休恒吉我二人共貞公其以
予萬億年敬天之休拜手稽首誨言節周公曰
王肇稱殷禮祀于新邑咸秩無文節予齊百工
侂從王于周予惟曰庶有事節今王卽命曰記
功宗以功作元祀惟命曰汝受命篤弼節丕視
功載乃汝其悉自教工節孺子其朋孺子其朋
其往無若火始燄燄厥攸灼叙弗其絕節厥若

彝及撫事如予惟以在周工往新邑侂嚮卽有
僚明作有功惇大成裕汝永有辭節公曰已汝
惟冲子惟終節汝其敬識百辟享亦識其有不
享享多儀儀不及物惟曰不享惟不役志于享
凡民惟曰不享惟事其爽侮節乃惟孺子頌朕
不暇聽朕教汝于棊民彝汝乃是不獲乃時惟
不承哉篤叙乃正父罔不若予不敢廢乃命汝
往敬哉茲予其明農哉彼裕我民無遠用戾節

王若曰。公明保予。冲子。公稱丕顯德。以予小子。揚文武烈。奉答天命。和恒四方民。居師。節。惇宗將禮。稱秩元祀。咸秩無文。節。惟公德。明光于上下。勤施于四方。旁作穆穆。迓衡。不迷文武。勤教。予冲子。夙夜恣祀。節。王曰。公功斐迪。篤罔不若時。節。王曰。公予小子其退。卽辟于周。命公後。節。四方迪亂。未定于宗禮。亦未克救公功。節。迪將其後。監我士師工。誕保文武受民。亂爲四輔。節。

漢書
我作

王曰。公定。予往已。公功肅將。祗歡公。無因哉。我惟無斃其康事。公勿替刑。四方其世享。節。周公拜手稽首曰。王命予來。承保乃文祖受命。民越乃光烈考。武王弘朕恭。節。孺子來相宅。其大惇典。殷獻民亂。爲四方新辟。作周恭先。曰。其自時中。又萬邦咸休。惟王有成績。節。予且以多子。越御事。篤前人成烈。答其師。作周孚先。考朕昭子刑。乃單文祖德。節。佅來恣殷。乃命寧予。以秬鬯。

五經

書

卷

二白曰明禋拜手稽首休享節予不敢宿則禋于文王武王節惠篤叙無有邁自疾萬年厭于乃德殷乃引考節王侔殷乃承叙萬年其永觀朕子懷德節戊辰王在新邑烝祭歲文王騂牛一武王騂牛一王命作册逸祝册惟告周公其後王賓殺禋咸格王入太室裸節王命周公後作册逸誥在十有二月節惟周公誕保文武受命惟七年。

多士

惟三月周公初于新邑洛用告商王節王若曰爾殷遺多士弗弔旻天大降喪于殷我有周佑命將天明威致王罰勅殷命終于帝節肆爾多士非我小國敢弋殷命惟天不畀允罔固亂弼我我其敢求位節惟帝不畀惟我下民秉爲惟天明畏節我聞曰上帝引逸有夏不適逸則惟帝降格嚮于時夏弗克庸帝大淫泆有辭惟

時天罔念聞厥惟廢元命降致罰節乃命爾先祖成湯革夏俊民甸四方節自成湯至于帝乙罔不明德恤祀節亦惟天丕建保乂有殷殷王亦罔敢失帝罔不配天其澤節在今後嗣王誕罔顯于天矧曰其有聽念于先王勤家誕淫厥洸罔顧于天顯民祗節惟時上帝不保降若茲大喪節惟天不畀不明厥德節凡四方小大邦喪罔非有辭于罰節王若曰爾殷多士今惟我

周王不靈承帝事節有命曰割殷告勅于帝節惟我事不貳適惟爾王家我適節予其曰惟爾洪無度我不爾動自乃邑節予亦念天卽于殷大戾肆不正節王曰猷告爾多士予惟時其遷居西爾非我一人奉德不康寧時惟天命無違朕不敢有後無我怨節惟爾知惟殷先人有册有典殷革夏命節今爾又曰夏迪簡在王庭有服在百僚予一人惟聽用德肆予敢求爾于天

邑商。予惟率肆矜爾。非予罪。時惟天命。節王曰。多士。昔朕來自奄。予大降爾四國民命。我乃明致天罰。移爾遐逃。比事。臣我宗多遜。節王曰。告爾殷多士。今予惟不爾殺。予惟時命有申。今朕作大邑于茲洛。予惟四方罔攸賓。亦惟爾多士。攸服奔走。臣我多遜。節爾乃尚有爾土。爾乃尚寧幹止。節爾克敬。天惟畀矜爾。爾不克敬。爾不啻不有爾土。予亦致天之罰于爾躬。節今爾惟

時宅爾邑。繼爾居。爾厥有幹。有年于茲洛。爾小子乃興從爾遷。節王曰。又曰。時予乃或言。爾攸居。

無逸

周公曰。嗚呼。君子所其無逸。節先知稼穡之艱。難乃逸。則知小人之依。節相小人。厥父母勤勞稼穡。厥子乃不知稼穡之艱難。乃逸。乃諺既誕。否則侮厥父母。曰。昔之人無聞知。節周公曰。嗚

呼我聞曰昔在殷王中宗嚴恭寅畏天命自度
 治民祇懼不敢荒寧肆中宗之享國七十有五
 年節其在高宗時舊勞于外爰暨小人作其卽
 位乃或亮陰三年不言其惟不言言乃雍不敢
 荒寧嘉靖殷邦至于小大無時或怨肆高宗之
 享國五十有九年節其在祖甲不義惟王舊為
 小人作其卽位爰知小人之依能保惠于庶民
 不敢侮鰥寡肆祖甲之享國三十有三年節自

時厥後立王生則逸生則逸不知稼穡之艱難
 不聞小人之勞惟耽樂之從自時厥後亦罔或
 克壽或十年或七八年或五六年或四三年節
 周公曰嗚呼厥亦惟我周太王王季克自抑畏
 節文王卑服卽康功田功節徽柔懿恭懷保小
 民惠鮮鰥寡自朝至于日中昃不遑暇食用咸
 和萬民節文王不敢盤于遊田以庶邦惟正之
 供文王受命惟中身厥享國五十年節周公曰

皇與
遑通

五終
鳴呼。繼自今嗣王。則其無淫于觀。于逸。于遊。于田。以萬民惟正之供。無皇曰。今日耽樂。乃非民攸訓。非天攸若。時人不則。有愆。無若殷王受之迷亂。酗于酒德哉。節周公曰。嗚呼。我聞曰。古之人猶昏訓告。胥保惠。胥教誨。民無或胥講張為幻。節此厥不聽。人乃訓之。乃變亂先王之正刑。至于小大。民否則厥心違怨。否則厥口詛祝。節周公曰。嗚呼。自殷王中宗。及高宗。及祖甲。及我

周文王。茲四人迪哲。節厥或告之曰。小人怨汝。詈汝。則皇自敬德。厥愆曰。朕之愆。允若時。不啻不敢含怒。節此厥不聽。人乃或講張為幻。曰。小人怨汝。詈汝。則信之。則若時。不永念厥辟。不寬綽厥心。亂罰無罪。殺無辜。怨有同。是叢于厥身。節周公曰。嗚呼。嗣王其監于茲。

君奭

周公若曰。君奭。節弗弔。天降喪于殷。殷既墜。厥

命。我有周既受。我不敢知。曰厥基永孚于休。若
天棐忱。我亦不敢知。曰其終出于不祥。節。嗚呼。
君已曰。時我。我亦不敢寧于上帝命。弗永遠念
天威。越我民罔尤違。惟人。在我後嗣子孫。大弗
克恭上下。遏佚前人光。在家不知。節。天命不易。
天難諶。乃其墜命。弗克經歷。嗣前人恭明德。節。
在今予小子。且非克有正。迪惟前人光。施于我
冲子。節。又曰。天不可信。我道惟寧。王德延。天不

庸釋于文王受命。節。公曰。君奭。我聞在昔成湯
既受命。時則有若伊尹。格于皇天。在太甲。時則
有若保衡。在太戊。時則有若伊陟。臣扈。格于上
帝。巫咸。乂王家。在祖乙。時則有若巫賢。在武丁。
時則有若甘盤。節。率惟茲有陳。保乂有殷。故殷
禮陟配天。多歷年所。節。天惟純佑命。則商實百
姓。王人罔不秉德明恤。小臣屏侯。甸矧咸奔走。
惟茲惟德稱。用乂厥辟。故一人有事于四方。若

五經
卜筮罔不是乎。節公曰：君奭，天壽平格，保乂有
殷，有殷嗣，天滅威，今汝永念，則有固命。厥亂明
我新造邦。節公曰：君奭，在昔上帝割申勸寧王
之德，其集大命于厥躬。節惟文王尚克修和我
有夏，亦惟有若虢叔，有若閔天，有若散宜生，有
若泰顛，有若南宮括。節又曰：無能往來，茲迪彝
教。文王蔑德，降于國人。節亦惟純佑，秉德迪知
天威，乃惟時昭文王。迪見冒聞于上帝，惟時受

有殷命哉。節武王惟茲四人，尚迪有祿。後暨武
王，誕將天威，咸劉厥敵，惟茲四人。昭武王惟冒
丕單稱德。節今在予小子旦，若游大川，予往暨
汝奭，其濟小子同。未即位，誕無我責，收罔勛不
及者，造德不降，我則鳴鳥不聞。矧曰：其有能格。
節公曰：嗚呼！君肆其監于茲，我受命無疆，惟休
亦大惟艱，告君乃猷裕，我不以後人迷。節公曰：
前人敷乃心，乃悉命汝，作汝民極。曰：汝明勛，偶

戡堪
用古通

王在亶乘茲大命。惟文王德丕承無疆之恤。節
公曰君告汝朕允保奭其汝克敬以予監于殷
喪大否肆念我天威。節予不允惟若茲誥予惟
曰襄我二人汝有合哉言曰在時二人天休滋
至惟時二人弗戡其汝克敬德明我俊民在讓
後人于丕時。節嗚呼篤棐時二人我式克至于
今日休我咸成文王功于不怠丕冒海隅出日
罔不率俾。節公曰君予不惠若茲多誥予惟用

閔于天越民。節公曰嗚呼君惟乃知民德亦罔
不能厥初惟其終祗若茲往敬用治。

蔡仲之命

惟周公位冢宰正百工羣叔流言乃致辟管叔
于商囚蔡叔于郭鄰以車七乘降霍叔于庶人
三年不齒蔡仲克庸祗德周公以為卿士叔卒
乃命諸王邦之蔡。節王若曰小子胡惟爾率德
改行克慎厥猷肆予命爾侯于東土往即乃封。

敬哉節爾尚蓋前人之愆惟忠惟孝爾乃邁迹
 自身克勤無怠以垂憲乃後率乃祖文王之彝
 訓無若爾考之違王命節皇天無親惟德是輔
 民心無常惟惠之懷為善不同同歸于治為惡
 不同同歸于亂爾其戒哉節慎厥初惟厥終終
 以不困不惟厥終終以困窮節懋乃攸績睦乃
 四鄰以蕃王室以和兄弟康濟小民節率自中
 無作聰明亂舊章詳乃視聽罔以側言改厥度

則予一人汝嘉節王曰嗚呼小子胡汝往哉無
 荒棄朕命

多方

惟五月丁亥王來自奄至于宗周節周公曰王
 若曰猷告爾四國多方惟爾殷侯尹民我惟大
 降爾命爾罔不知節洪惟圖天之命弗永寅念
 于祀節惟帝降格于夏有夏誕厥逸不肯感言
 于民乃大淫昏不克終日勸于帝之迪乃爾攸

聞節 厥圖帝之命不克開于民之麗乃大降罰
崇亂有夏因甲于內亂不克靈承于旅罔不惟
進之恭洪舒于民亦惟有夏之民叨憤日欽劓
割夏邑節 天惟時求民主乃大降顯休命于成
湯刑殄有夏節 惟天不畀純乃惟以爾多方之
義民不克永于多享惟夏之恭多士大不克明
保享于民乃胥惟虐于民至于百爲大不克開
節 乃惟成湯克以爾多方簡代夏作民主節 慎

厥麗乃勸厥民刑用勸節 以至于帝乙罔不明
德慎罰亦克用勸節 要囚殄戮多罪亦克用勸
開釋無辜亦克用勸節 今至于爾辟弗克以爾
多方享天之命節 嗚呼王若曰誥告爾多方非
天庸釋有夏非天庸釋有殷節 乃惟爾辟以爾
多方大淫圖天之命屑有辭節 乃惟有夏圖厥
政不集于享天降時喪有邦間之節 乃惟爾商
後王逸厥逸圖厥政不蠲烝天惟降時喪節 惟

聖罔念作狂，惟狂克念作聖。天惟五年，須臾之
 子孫，誕作民主。罔可念聽。節天惟求爾多方，大
 動以威，開厥顧天。惟爾多方，罔堪顧之。節惟我
 周王，靈承于旅，克堪用德。惟典神天，天惟式教
 我用休。簡畀殷命，尹爾多方。節今我曷敢多誥，
 我惟大降爾四國民命。節爾曷不忱裕之于爾
 多方，爾曷不夾介乂我周王，享天之命。今爾尚
 宅爾宅，畋爾田。爾曷不惠王，熙天之命。節爾乃

迪屢不靜，爾心未愛爾，乃不大宅天命。爾乃屑
 播天命，爾乃自作不典，圖忱于正。節我惟時其
 教告之，我惟時其戰要囚之。至于再，至于三，乃
 有不用我降爾命，我乃其大罰殛之。非我有周
 秉德不康寧，乃惟爾自速辜。節王曰：嗚呼！猷告
 爾有方多士，暨殷多士。今爾奔走，臣我監五祀。
節越惟有胥伯，小大多正。爾罔不克臬。節自作
 不和，爾惟和哉。爾室不睦，爾惟和哉。爾邑克明。

爾惟克勤乃事節爾尚不忌于凶德亦則以穆
 穆在乃位克閱于乃邑謀介節爾乃自時洛邑
 尚永力畋爾田天惟畀矜爾我有周惟其大介
 賚爾迪簡在王庭尚爾事有服在大僚節王曰
 嗚呼多士爾不克勸忱我命爾亦則惟不克享
 凡民惟曰不享爾乃惟逸惟頗大遠王命則惟
 爾多方探天之威我則致天之罰離逃爾土節
 王曰我不惟多誥我惟祗告爾命節又曰時惟

爾初不克敬于和則無我怨

立政

周公若曰拜手稽首告嗣天子王矣用咸戒于
 王曰王左右常伯常任準人綴衣虎賁周公曰
 嗚呼休茲知恤鮮哉節古之人迪惟有夏乃有
 室大競顛俊尊上帝迪知忱恂于九德之行乃
 敢告教厥后曰拜手稽首后矣曰宅乃事宅乃
 牧宅乃準茲惟后矣謀面用丕訓德則乃宅人

五經
書下
五
茲乃三宅無義民節桀德惟乃弗作往任是惟
暴德罔後節亦越成湯陟丕釐上帝之耿命乃
用三有宅克卽宅曰三有俊克卽俊嚴惟丕式
克用三宅三俊其在商邑用協于厥邑其在四
方用丕式見德節嗚呼其在受德暨惟羞刑暴
德之人同于厥邦乃惟庶習逸德之人同于厥
政帝欽罰之乃侔我有夏式商受命奄甸萬姓
節亦越文王武王克知三有宅心灼見三有俊

心以敬事上帝立民長伯節立政任人準夫牧
作三事節虎賁綴衣趣馬小尹左右攜僕百司
庶府節大都小伯藝人表臣百司太史尹伯庶
常吉士節司徒司馬司空亞旅節夷微盧烝三
亳阪尹節文王惟克厥宅心乃克立茲常事司
牧人以克俊有德節文王罔攸兼于庶言庶獄
庶慎惟有司之牧夫是訓用違節庶獄庶慎文
王罔敢知于茲節亦越武王率惟教功不敢替

厥義德率惟謀從容德以並受此丕丕基節嗚呼孺子王矣繼自今我其立政立事準人牧夫我其克灼知厥若丕乃俾亂相我受民和我庶獄庶慎時則勿有間之節自一話一言我則末惟成德之彥以乂我受民節嗚呼予且已受人之微言咸告孺子王矣繼自今文子文孫其勿誤于庶獄庶慎惟正是乂之節自古商人亦越我周文王立政立事牧夫準人則克宅之克由

繹之茲乃俾乂節國則罔有立政用儉人不訓于德是罔顯在厥世繼自今立政其勿以儉人其惟吉士用勩相我國家節今文子文孫孺子王矣其勿誤于庶獄惟有司之牧夫節其克詰爾戎兵以陟禹之迹方行天下至于海表罔有不服以覲文王之耿光以揚武王之大力節嗚呼繼自今後王立政其惟克用常人節周公若曰太史司寇蘇公式敬爾由獄以長我王國茲

式有慎以列用中罰

周官

惟周王撫萬邦巡侯甸四征弗庭綏厥兆民六服羣辟罔不承德歸于宗周董正治官節王曰若昔大猷制治于未亂保邦于未危節曰唐虞稽古建官惟百內有百揆四岳外有州牧侯伯庶政惟和萬國咸寧夏商官倍亦克用乂明王立政不惟其官惟其人節今予小子祇勤于德

夙夜不逮仰惟前代時若訓迪厥官節立大師

太傅太保茲惟三公論道經邦燮理陰陽官不

必備惟其人節少師少傅少保曰三孤貳公弘

化寅亮天地弼予一人節冢宰掌邦治統百官

均四海節司徒掌邦教敷五典擾兆民節宗伯

掌邦禮治神人和上下節司馬掌邦政統六師

平邦國節司寇掌邦禁詰姦慝刑暴亂節司空

掌邦土居四民時地利節六卿分職各率其屬

以倡九牧阜成兆民節六年五服一朝又六年
 王乃時巡考制度于四岳諸侯各朝于方岳大
 明黜陟節王曰嗚呼凡我有官君子欽乃攸司
 慎乃出令令出惟行弗惟反以公滅私民其允
 懷節學古入官議事以制政乃不迷其爾典常
 作之師無以利口亂厥官蓄疑敗謀怠忽荒政
 不學牆面莅事惟煩節戒爾卿士功崇惟志業
 廣惟勤惟克果斷乃罔後艱節位不期驕祿不

期侈恭儉惟德無載爾僞作德心逸日休作僞
 心勞日拙節居寵思危罔不惟畏節弗畏入畏
 推賢讓能庶官乃和不和政厖舉能其官惟爾
 之能稱匪其人惟爾不任節王曰嗚呼三事暨
 大夫敬爾有官亂爾有政以佑乃辟永康兆民
 萬邦惟無斁

君陳

王若曰君陳惟爾令德孝恭惟孝友于兄弟克

五經
施有政命汝尹茲東郊敬哉節昔周公師保萬
民民懷其德往慎乃司茲率厥常懋昭周公之
訓惟民其乂節我聞曰至治馨香感于神明黍
稷非馨明德惟馨爾尚式時周公之猷訓惟日
孜孜無敢逸豫節凡人未見聖若不克見既見
聖亦不克由聖爾其戒哉爾惟風下民惟草節
圖厥政莫或不艱有廢有興出入自爾師虞庶
言同則繹節爾有嘉謀嘉猷則入告爾后于內

爾乃順之于外曰斯謀斯猷惟我后之德嗚呼
臣人咸若時惟良顯哉節王曰君陳爾惟弘周
公丕訓無依勢作威無倚法以削寬而有制從
容以和節殷民在辟予曰辟爾惟勿辟予曰宥
爾惟勿宥惟厥中節有弗若于汝政弗化于汝
訓辟以止辟乃辟節狃于茲宄敗常亂俗三細
不宥節爾無忿疾于頑無求備于一夫節必有
忍其乃有濟有容德乃大節簡厥修亦簡其或

不修進厥良以率其或不良節惟民生厚因物
有遷違上所命從厥攸好爾克敬典在德時乃
罔不變允升于大猷惟予一人膺受多福其爾
之休終有辭於永世

顧命

惟四月哉生魄王不懌節甲子王乃洮頰水相
被冕服憑玉几節乃同召太保奭芮伯彤伯畢
公衛侯毛公師氏虎臣百尹御事節王曰嗚呼

疾大漸惟幾病日臻既彌留恐不獲誓言嗣茲
予審訓命汝節昔君文王武王宣重光奠麗陳
教則肄肄不違用克達殷集大命節在後之侗
敬迓天威嗣守文武大訓無敢昏逾節今天降
疾殆弗興弗悟爾尚明時朕言用敬保元子釗
弘濟于艱難節柔遠能邇安勸小大庶邦節思
夫人自亂于威儀爾無以釗冒貢于非幾節茲
既受命還出綴衣于庭越翼日乙丑王崩節太

保命仲桓南宮毛俾爰齊侯呂伋以二于戈虎
 賁百人逆子釗於南門之外延入翼室恤宅宗
 節丁卯命作冊度節越七日癸酉伯相命士須
 材節狄設黼辰綴衣節牖間南嚮敷重篋席黼
 純華玉仍几節西序東嚮敷重底席綴純文具
 仍几節東序西嚮敷重豐席畫純雕玉仍几節
 西夾南嚮敷重筍席玄紛純漆仍几節越玉五
 重陳寶赤刀大訓弘璧琬琰在西序大玉夷玉

銳當
 作銳

天球河圖在東序胤之舞衣大貝鼗鼓在西房
 兌之戈和之弓垂之竹矢在東房節大輅在賓
 階面綴輅在阼階面先輅在左塾之前次輅在
 右塾之前節二人雀弁執惠立于畢門之內四
 人綦弁執戈上刃夾兩階阼一人冕執劉立于
 東堂一人冕執鉞立于西堂一人冕執戣立于
 東垂一人冕執矟立于西垂一人冕執銳立于
 側階節王麻冕黼裳由賓階降卿士邦君麻冕

蟻裳入卽位節太保太史太宗皆麻冕形裳太保承介圭上宗奉同瑁由阼階濟太史秉書由賓階濟御王冊命節曰皇后憑玉几道揚末命命汝嗣訓臨君周邦率循大卞燮和天下用答揚文武之光訓節王再拜興答曰眇眇予末小子其能而亂四方以敬忌天威節乃受同瑁王三宿三祭三咤上宗曰饗節太保受同降盥以異同秉璋以酢授宗人同拜王答拜節太保受

同祭濟宅授宗人同拜王答拜節太保降收諸侯出廟門俟

康王之誥

王出在應門之內太保率西方諸侯入應門左畢公率東方諸侯入應門右皆布乘黃朱賓稱奉圭兼幣曰一二臣衛敢執壤奠皆再拜稽首王義嗣德答拜節太保暨芮伯咸進相揖皆再拜稽首曰敢敬告天子皇天改大邦殷之命惟

周文武誕受美若克恤西土節惟新陟王畢協
 賞罰戡定厥功用敷遺後人休今王敬之哉張
 皇六師無壞我高祖寡命節王若曰庶邦侯甸
 男衛惟予一人釗報誥節昔君文武丕平富不
 務咎底至齊信用昭明于天下則亦有熊羆之
 士不二心之臣保乂王家用端命于上帝皇天
 用訓厥道付畀四方節乃命建侯樹屏在我後
 之人今予一二伯父尚胥暨顧綏爾先公之臣

服于先王雖爾身在外乃心罔不在王室用奉
 恤厥若無遺鞠子羞節羣公既皆聽命相揖趨
 出王釋冕反喪服

畢命

惟十有二年六月庚午朏越三日壬申王朝步
 自宗周至于豐以成周之衆命畢公保釐東郊
 節王若曰嗚呼父師惟文王武王敷大德于天
 下用克受殷命節惟周公左右先王綏定厥家

五經 書 卷一
愆殷頑民遷于洛邑密邇王室式化厥訓既歷
三紀世變風移四方無虞予一人以寧節道有
升降政由俗革不臧厥臧民罔攸勸節惟公懋
德克勤小物弼亮四世正色率下罔不祇師言
嘉績多于先王予小子垂拱仰成節王曰嗚呼
父師今予祇命公以周公之事往哉節旌別淑
慝表厥宅里彰善癉惡樹之風聲弗率訓典殊
厥井疆俾克畏慕申畫郊圻慎固封守以康四

海節政貴有恒辭尚體要不惟好異商俗靡靡
利口惟賢餘風未殄公其念哉節我聞曰世祿
之家鮮克由禮以蕩陵德實悖天道敝化奢麗
萬世同流節茲殷庶士席寵惟舊怙侈滅義服
美于人驕淫矜侈將由惡終雖收放心閑之惟
艱節資富能訓惟以永年惟德惟義時乃大訓
不由古訓于何其訓節王曰嗚呼父師邦之安
危惟茲殷士不剛不柔厥德允修節惟周公克

慎厥始。惟君陳克和厥中。惟公克成厥終。三后
 協心同底于道。道洽政治。澤潤生民。四夷左衽。
 罔不咸賴。予小子永膺多福。節公其惟時成周。
 建無窮之基。亦有無窮之聞。子孫訓其成式。惟
 又節嗚呼。罔曰弗克。惟既厥心。罔曰民寡。惟慎
 厥事。欽若先王成烈。以休于前政。

君牙

王若曰。嗚呼。君牙。惟乃祖乃父。世篤忠貞。服勞

王家。厥有成績。紀于太常。節惟予小子。嗣守文
 武成康遺緒。亦惟先王之臣。克左右亂四方。心
 之憂危。若踏虎尾。涉于春冰。節今命爾。予翼作
 股肱。心膂。纘乃舊服。無忝祖考。節弘敷五典。式
 和民則。爾身克正。罔敢弗正。民心罔中。惟爾之
 中。節夏暑雨。小民惟曰怨咨。冬祁寒。小民亦惟
 曰怨咨。厥惟艱哉。思其艱以圖其易。民乃寧。節
 嗚呼。不顯哉。文王謨。丕承哉。武王烈。啓佑我後

五經
人咸以正罔缺爾惟敬明乃訓用奉若干先王
對揚文武之光命追配于前人節王若曰君牙
乃惟由先正舊典時式民之治亂在茲率乃祖
考之攸行昭乃辟之有義

罔命

王若曰伯罔惟予弗克于德嗣先人宅丕后怵
惕惟厲中夜以興思免厥愆節昔在文武聰明
齊聖小大之臣咸懷忠良其侍御僕從罔匪正

人以旦夕承弼厥辟出入起居罔有不欽發號
施令罔有不臧下民祇若萬邦咸休節惟予一
人無良實賴左右前後有位之士匡其不及繩
愆糾謬格其非心俾克紹先烈節今予命汝作
大正正于羣僕侍御之臣懋乃后德交修不逮
節慎簡乃僚無以巧言令色便辟側媚其惟吉
士節僕臣正厥后克正僕臣諛厥后自聖后德
惟臣不德惟臣節爾無昵于儉人充耳目之官

迪上以非先王之典節非人其吉惟貨其吉若時瘝厥官惟爾大弗克祗厥辟惟予汝辜節王曰嗚呼欽哉永弼乃后于彝憲

呂刑

惟呂命王享國百年耄荒度作刑以詰四方節王曰若古有訓蚩尤惟始作亂延及于平民罔不寇賊鴟義姦宄奪攘矯虔節苗民弗用靈制以刑惟作五虐之刑曰法殺戮無辜爰始淫為

劓則椽黥越茲麗刑并制罔差有辭節民興胥漸泯泯焚焚罔中于信以覆詛盟虐威庶戮方告無辜于上帝監民罔有馨香德刑發聞惟腥節皇帝哀矜庶戮之不辜報虐以威遏絕苗民無世在下節乃命重黎絕地天通罔有降格羣后之逮在下明明棗常鰥寡無蓋節皇帝清問下民鰥寡有辭于苗德威惟畏德明惟明節乃命三后恤功于民伯夷降典折民惟刑禹平

水土主名山川。稷降播種，農殖嘉穀，三后成功。惟殷于民。節士制百姓于刑之中，以教祗德。節穆穆在上，明明在下，灼于四方，罔不惟德之勤。故乃明于刑之中，率乂于民。棗彝。節典獄非訖于威，惟訖于富。敬忌，罔有擇言在身。惟克天德，自作元命，配享在下。節王曰：嗟，四方司政典獄，非爾惟作天牧。今爾何監？非時伯夷播刑之迪。其今爾何懲？惟時苗民匪察于獄之麗，罔擇吉。

雖畏
畏威
用古
通

人觀于五刑之中，惟時庶威奪貨，斷制五刑，以亂無辜。上帝不蠲，降咎于苗。苗民無辭于罰，乃絕厥世。節王曰：嗚呼！念之哉！伯父伯兄，仲叔季弟，幼子童孫，皆聽朕言。庶有格命。今爾罔不由愆，日勤爾罔，或戒不勤。天齊于民，俾我一日，非終惟終。在人爾尚敬逆天命，以奉我一人。雖畏，勿畏。雖休，勿休。惟敬五刑，以成三德。一人有慶，兆民賴之。其寧。惟永。節王曰：吁！來，有邦有土，告

爾祥刑。在今爾安百姓。何擇非人。何敬非刑。何
度非及。節兩造具備。師聽五辭。五辭簡孚。正于
五刑。五刑不簡。正于五罰。五罰不服。正于五過。
節五過之疵。惟官惟反。惟內惟貨。惟來其罪。惟
均。其審克之。節五刑之疑。有赦。五罰之疑。有赦。
其審克之。簡孚有衆。惟貌有稽。無簡不聽。具嚴
天威。節墨辟疑赦。其罰百鍰。閱實其罪。劓辟疑
赦。其罰惟倍。閱實其罪。剕辟疑赦。其罰倍差。閱

實其罪。宮辟疑赦。其罰六百鍰。閱實其罪。大辟
疑赦。其罰千鍰。閱實其罪。墨罰之屬千。劓罰之
屬千。剕罰之屬五百。宮罰之屬二百。大辟之罰。
其屬二百。五刑之屬二千。上下比罪。無僭亂辭。
勿用不行。惟察惟法。其審克之。節上刑適輕。下
服。下刑適重。上服。輕重諸罰。有權。刑罰世輕世
重。惟齊非齊。有倫有要。節罰懲非死。人極于病。
非佞折獄。惟良折獄。罔非在中。察辭于差。非從

五經
惟從哀敬折獄。明啓刑書。胥占咸庶中正。其刑其罰。其審克之。獄成而孚。輸而孚。其刑上備。有并兩刑。節王曰。嗚呼。敬之哉。官伯族姓。朕言多懼。朕敬于刑。有德惟刑。今天相民。作配在下。明清于單辭。民之亂罔不中聽。獄之兩辭。無或私家于獄之兩辭。獄貨非寶。惟府辜功。報以庶尤。永畏惟罰。非天不中。惟人在命。天罰不極。庶民罔有令政。在于天下。節王曰。嗚呼。嗣孫。今往何

監。非德于民之中。尚明聽之哉。哲人惟刑。無疆之辭。屬于五極。咸中有慶。受王嘉師。監于茲祥刑。

文侯之命

王若曰。父義和。丕顯文武。克慎明德。昭升于上。敷聞在下。惟時上帝。集厥命于文王。亦惟先正。克左右。昭事厥辟。越小大謀猷。罔不率從。肆先祖懷在位。節嗚呼。閔予小子。嗣造天丕愆。殄資

澤于下民。侵我國家。純卽我御事。罔或者壽。俊在厥服。予則罔克。曰。惟祖惟父。其伊恤朕躬。嗚呼。有績予一人。永綏在位。節。父義和。汝克昭。乃顯祖。汝肇刑文武。用會紹。乃辟。追孝于前文。人。汝多修扞我于艱。若汝予嘉。節。王曰。父義和。其歸視爾師。寧爾邦。用賚爾秬鬯。一卣。彤弓一。彤矢百。盧弓一。盧矢百。馬四匹。父往哉。柔遠能。邇。惠康小民。無荒寧。簡恤爾都。用成爾顯德。

費誓

公曰。嗟。人無譁聽命。徂茲淮夷。徐戎並興。節。善。敕乃甲冑。敵乃干。無敢不弔。備乃弓矢。鍛乃戈。矛。礪乃鋒刃。無敢不善。節。今惟淫舍。牯牛馬。杜。乃獲斂。乃穽。無敢傷牯。牯之傷。汝則有常刑。節。馬牛其風。臣妾逋逃。勿敢越逐。祇復之。我商賚。汝乃越逐。不復。汝則有常刑。無敢寇攘。踰垣墻。竊馬牛。誘臣妾。汝則有常刑。節。甲戌。我惟征徐。

五經
戎峙乃糗糧無敢不逮汝則有大刑魯人三郊
三遂峙乃楨榦甲戌我惟築無敢不供汝則有
無餘刑非殺魯人三郊三遂峙乃芻茭無敢不
多汝則有大刑

秦誓

公曰嗟我士聽無譁予誓告汝羣言之首節古
人有言曰民訖自若是多盤責人斯無難惟受
責俾如流是惟艱哉節我心之憂日月逾邁若

弗云來節惟古之謀人則曰未就予忌惟今之
謀人姑將以爲親雖則云然尚猷詢茲黃髮則
罔所愆節番番良士旅力旣愆我尚有之侂侂
勇夫射御不違我尚不欲惟截截善譎言俾君
子易辭我皇多有之節昧昧我思之如有一介
臣斷斷猗無他技其心休休焉其如有容人之
有技若已有之人之彥聖其心好之不啻如自
其口出是能容之以保我子孫黎民亦職有利

哉節人之有技冒疾以惡之人之彥聖而違之
俾不達是不能容以不能保我子孫黎民亦曰
殆哉節邦之杌隍曰由一人邦之榮懷亦尚一
人之慶

書經終

慶應三年刊

官版書籍發行所

東都橫山町壹丁目角

御書物師

出雲寺萬次郎

近藤信吉

五經

